

李白诗全集(一)

[唐]李白 著

辽宁电子图书有限责任公司

李白诗全集(一)

[唐]李白 著

辽宁电子图书有限责任公司

2003年3月第28版

开本:850×1168毫米 1/32 字数:150千字

ISBN L-0000-01547/ I222.742 定价:15.00 元

目 录

卷一（古诗五十九首）	2
卷二（乐府三十首）	38
卷三（乐府三十七首）	65
卷四（乐府四十四首）	90
卷五（乐府三十八首）	114
卷六（古近体诗二十八首）	137

卷一

古诗五十九首

其一

大雅久不作。
吾衰竟谁陈。
王风委蔓草。
战国多荆榛。
龙虎相啖食。
兵戈逮狂秦。
正声何微茫。
哀怨起骚人。
扬马激颓波。
开流荡无垠。
废兴虽万变。
宪章亦已沦。
自从建安来。
绮丽不足珍。
圣代复元古。
垂衣贵清真。
群才属休明。
乘运共跃鳞。
文质相炳焕。
众星罗秋旻。
我志在删述。
垂辉映千春。
希圣如有立。
绝笔于获麟。

其二

蟾蜍薄太清。

蚀此瑶台月。
圆光亏中天。
金魄遂沦没。
入紫微。
大明夷朝晖。
浮云隔两曜。
万象昏阴霏。
萧萧长门宫。
昔是今已非。
桂蠹花不实。
天霜下严威。
沈叹终永夕。
感我涕沾衣。

其三

秦皇扫六合。
虎视何雄哉。
挥剑决浮云。（挥一作飞）
诸侯尽西来。
明断自天启。
大略驾群才。
收兵铸金人。
函谷正东开。
铭功会稽岭。
骋望琅琊台。
刑徒七十万。
起土骊山隈。
尚采不死药。
茫然使心哀。
连弩射海鱼。
长鲸正崔嵬。
额鼻象五岳。
扬波喷云雷。
髣髴蔽青天。
何由睹蓬莱。
徐市载秦女。
楼船几时回。

但见三泉下。
金棺葬寒灰。

其四

凤飞九千仞。
五章备彩珍。
衔书且虚归。
空入周与秦。
横绝历四海。
所居未得邻。
吾营紫河车。
千载落风尘。
药物秘海岳。
采铅青溪滨。
时登大楼山。
举首望仙真。（首一作手）
羽驾灭去影。
飚车绝回轮。
尚恐丹液迟。
志愿不及申。
徒霜镜中发。
羞彼鹤上人。
桃李何处开。
此花非我春。
唯应清都境。
长与韩众亲。

其五

太白何苍苍。
星辰上森列。
去天三百里。
邈尔与世绝。
中有绿发翁。
披云卧松雪。
不笑亦不语。
冥栖在岩穴。

我来逢真人。
长跪问宝诀。
粲然启玉齿。（启玉齿一作忽自哂）
授以炼药说。
铭骨传其语。
竦身已电灭。
仰望不可及。
苍然五情热。
吾将营丹砂。
永与世人别。

其六

代马不思越。
越禽不恋燕。
情性有所习。
土风固其然。（固其然一作其固然）
昔别雁门关。
今戍龙庭前。
惊沙乱海日。
飞雪迷胡天。
虬虱生虎虬。
心魂逐旌旃。
苦战功不赏。
忠诚难可宣。
谁怜李飞将。
白首没三边。

其七

五鹤西北来。
飞飞凌太清。
仙人绿云上。
自道安期名。
两两白玉童。
双吹紫鸾笙。
去影忽不见。
回风送天声。

我欲一问之。（一作举首远望之）

飘然若流星。

愿餐金光草。

寿与天齐倾。

（此诗另有一作

客有鹤上仙。

飞飞凌太清。

扬言碧云里。

自道安期名。

两两白玉童。

双吹紫鸾笙。

飘然下倒影。

倏忽无留形。

遗我金光草。

服之四体轻。

将随赤松去。

对博坐蓬瀛。）

其八

咸阳二三月。

宫柳黄金枝。

绿帟谁家子。

卖珠轻薄儿。

日暮醉酒归。

白马骄且驰。

意气人所仰。

冶游方及时。

子云不晓事。

晚献长杨辞。

赋达身已老。

草玄鬓若丝。

投阁良可叹。

但为此辈嗤。

其九

庄周梦胡蝶。

胡蝶为庄周。
一体更变易。
万事良悠悠。
乃知蓬莱水。
复作清浅流。
青门种瓜人。
旧日东陵侯。
富贵故如此。（故一作固）
营营何所求。

其十

齐有倜傥生。
鲁连特高妙。
明月出海底。
一朝开光曜。
却秦振英声。
後世仰末照。
意轻千金赠。
顾向平原笑。
吾亦澹荡人。
拂衣可同调。

其十一

黄河走东溟。
白日落西海。
逝川与流光。
飘忽不相待。
春容舍我去。
秋发已衰改。
人生非寒松。
年貌岂长在。（年貌一作颜色）
吾当乘云螭。
吸景驻光彩。
（上二句一作
谁能学天飞。
吸景驻光彩。）

其十二

松柏本孤直。
难为桃李颜。
昭昭严子陵。
垂钓沧波间。
身将客星隐。
心与浮云闲。
长揖万乘君。
还归富春山。
清风洒六合。
邈然不可攀。
使我长叹息。
冥栖岩石间。

其十三

君平既弃世。
世亦弃君平。
观变穷太易。
探元化群生。
寂寞缀道论。
空帘闭幽情。
邈虞不虚来。
鸞鷟有时鸣。
安知天汉上。
白日悬高名。
海客去已久。
谁人测沈冥。

其十四

胡关饶风沙。
萧索竟终古。
木落秋草黄。
登高望戎虏。
荒城空大漠。

边邑无遗堵。
白骨横千霜。
嵯峨蔽榛莽。
借问谁凌虐。
天骄毒威武。
赫怒我圣皇。
劳师事鞞鼓。
阳和变杀气。
发卒骚中土。
三十六万人。
哀哀泪如雨。
且悲就行役。
安得营农圃。
不见征戍儿。
岂知关山苦。
(一本此下有
争锋徒死节。
秉钺皆庸竖。
战士死蒿莱。
将军获圭组。
四句)

李牧今不在。
边人饲豺虎。

其十五

燕昭延郭隗。
遂筑黄金台。
剧辛方赵至。
邹衍复齐来。
奈何青云士。
弃我如尘埃。
珠玉买歌笑。
糟糠养贤才。
方知黄鹤举。
千里独徘徊。

其十六

宝剑双蛟龙。
雪花照芙蓉。
精光射天地。
雷腾不可冲。
一去别金匣。
飞沉失相从。
风胡灭已久。
所以潜其锋。
吴水深万丈。
楚山邈千重。
雌雄终不隔。
神物会当逢。（当一作相）

其十七

金华牧羊儿。
乃是紫烟客。
我愿从之游。
未去发已白。
不知繁华子。
扰扰何所迫。
昆山采琼蕊。（蕊一作蕤）
可以炼精魄。

其十八

天津三月时。
千门桃与李。
朝为断肠花。
暮逐东流水。
前水复后水。
古今相续流。
新人非旧人。
年年桥上游。
鸡鸣海色动。
谒帝罗公侯。

月落西上阳。（西上阳一作上阳西）
余辉半城楼。
衣冠照云日。
朝下散皇州。
鞍马如飞龙。
黄金络马头。
行人皆辟易。
志气横高丘。
入门上高堂。
列鼎错珍羞。
香风引赵舞。
清管随齐讴。
七十紫鸳鸯。
双双戏庭幽。
行乐争昼夜。
自言度千秋。
功成身不退。
自古多愆尤。
黄犬空叹息。
绿珠成衅雠。
何如鸱夷子。
散发棹扁舟。（棹一作弄）

其十九

西岳莲花山。（岳一作上）
迢迢见明星。
素手把芙蓉。
虚步蹑太清。
霓裳曳广带。
飘拂升天行。
邀我登云台。
高揖卫叔卿。
恍恍与之去。
驾鸿凌紫冥。
俯视洛阳川。
茫茫走胡兵。
流血涂野草。

豺狼尽冠纓。

其二十

昔我游齊都。
登華不注峰。
茲山何峻秀。
綠翠如芙蓉。
蕭颯古仙人。
了知是赤松。
借予一白鹿。
自挾兩青龍。
含笑凌倒景。
欣然愿相從。
(一本此十句作一首)

泣與親友別。
欲語再三咽。
勸君青松心。
努力保霜雪。
世路多險艱。
白日欺紅顏。
分手各千里。
去去何時還。
(一本此八句作一首)

在世復幾時。
倏如飄風度。
空聞紫金經。
白首愁相誤。
撫己忽自笑。
沉吟為誰故。
名利徒煎熬。
安得閑余步。
終留赤玉舄。
東上蓬萊路。(萊一作山)
秦帝如我求。
蒼蒼但煙霧。

(一本此十二句作一首)

其二十一

郢客吟白雪。
遗响飞青天。
徒劳歌此曲。
举世谁为传。
试为巴人唱。
和者乃数千。
吞声何足道。
叹息空凄然。

其二十二

秦水别陇首。
幽咽多悲声。
胡马顾朔雪。
躑躅长嘶鸣。
感物动我心。
缅然含归情。
昔视秋蛾飞。
今见春蚕生。
袅袅桑柘叶。 (柘一作结)
萋萋柳垂荣。
急节谢流水。
羁心摇悬旌。
挥涕且复去。
惻怆何时平。

其二十三

秋露白如玉。
团团下庭绿。
我行忽见之。
寒早悲岁促。
人生鸟过目。
胡乃自结束。

景公一何愚。
牛山泪相续。
物苦不知足。
得陇又望蜀。
人心若波澜。
世路有屈曲。
三万六千日。
夜夜当秉烛。

其二十四

大车扬飞尘。
亭午暗阡陌。
中贵多黄金。
连云开甲宅。
路逢斗鸡者。
冠盖何辉赫。
鼻息干虹霓。
行人皆怵惕。
世无洗耳翁。
谁知尧与跖。

其二十五

世道日交丧。
浇风散淳源。
不采芳桂枝。
反栖恶木根。
所以桃李树。
吐花竟不言。
大运有兴没。
群动争飞奔。
归来广成子。
去入无穷门。

其二十六

碧荷生幽泉。

朝日艳且鲜。
秋花冒绿水。
密叶罗青烟。
秀色空绝世。
馨香竟谁传。
坐看飞霜满。
凋此红芳年。
结根未得所。
愿托华池边。

其二十七

燕赵有秀色。
绮楼青云端。
眉目艳皎月。
一笑倾城欢。
常恐碧草晚。
坐泣秋风寒。
纤手怨玉琴。
清晨起长叹。
焉得偶君子。
共乘双飞鸾。

其二十八

容颜若飞电。
时景如飘风。
草绿霜已白。
日西月复东。
华鬓不耐秋。（鬓一作发）
飒然成衰蓬。
古来贤圣人。
一一谁成功。
君子变猿鹤。
小人为沙虫。
不及广成子。
乘云驾轻鸿。